

陰不生言月窟而天根該之矣君子曰美哉若人處  
貴富之地而獨能研理道以自娛乃嘉靖癸巳夏六  
月二十八日母魏卒始魏爲靖簡王宮人卒未封也  
月窟子乃上疏以請其畧曰臣母魏氏侍臣父靖簡  
王多歷年所平生塵瘁之蹟貞白之操繫邦人所共  
聞者臣聞母以子貴臣荷天之休受鎮國將軍而臣  
母未沐冠帔之榮心實悲怛伏惟 皇上曠蕩之  
恩涵濡群動凡文武臣工咸得以子貴榮其親而子  
也鎮國母也宮人烏烏私情其何以安倘賜哀憐感  
戴罔極矣 帝允之詔追封鄔陵靖簡王宮人魏

氏爲夫人賜祭一壇君子曰孝哉若人生事其母孝  
而卒也又遂其榮封月窟子之卒也其子睦榘號泣  
再拜丐誌誌曰月窟子諱安漂厥生何弘治丁巳二  
月二十六日也厥卒何嘉靖乙未二月五日也厥疾  
何痠痺也厥壽何三十有九也 勅營壙諭祭咸如  
制子一即睦榘女二長湖州郡君字魏雄才次未封  
余友月窟父頗賢其爲人故於其卒也弔之哭之奠  
之賻之文以誌之又從而銘之銘曰

貴賤殊倫同一土墳滅彩沉芬吁嗟乎將軍彭殤異  
骨同一蕪沒歲月飄忽吁嗟乎月窟柳林之原草木